

GALBIDE EDERRA

Gaua eguna baino argiagoa da
Negua uda baino amultsuagoa.
Mundua buruz behera dagoela nork uka?
Gure baitatik kanpo bizi omen gara.

Zu zaitut salbabide, azken esperantza
Zugan baino ezin nik aurkitu neure burua.
Zu zaitut salbabide, galbide ederra
Zugan baino ezin nik galdu neure burua.

Dena atzekoz aurrera dagoela bistan da.
Galbidean barrena gabiltza guztiak
Nahaste-borraste ederra gugan errotuta
Hortik nola atera inork asmatu ahal?

Zu zaitut salbabide...

Hondamendia hemen da
Ustekabean helduta.
Hondamendia hemen da
Guretzat azken aukera.

Zu zaitut salbabide...

KITO

Mailu bat omen da bakea
Mailu bat gogorki jotzeko
Gerraren alde omen direnak.
Oro ezia, oro esnea
Denon artean banatzeko
Jo aurretik hondar sirenak.

Mundu alu honen bukaera
Hemen da guztiontzat.
Munduaren argia
Betiko itzalita.

Gerlarik gabe bakerik ez
Eta surik gabe ezin erre.
Halaxe gauzak, zer egin ote?
Biziko gara halabeharrez
Edo ilun eta haserre
Noraezean eta arlote.

Mundu alu honen bukaera...

Gero eta gehiago ezin da.
Nahikorik ez guztiontzat.
Atertu gabeko gezurra
Zer hartuko guk aintzakotzat.

Mundu alu honen bukaera...

UDABERRIA

Akabo negu gorria

Udaberria jada

Lurra itzarri eta dena

Liliz mukurutua.

Hormatzen gintuen hotzak

Egin du iparrera

Urtaro hasi berriak

Badu bihotz epela.

Gure egunik ederrenak

Bidean omen dira

Atzean utzitakoak

Itzuliko ez baitira.

Hotzak eragin ospelak

Harekin joanen dira

Nire bi esku leunek

Besterik ez desira.

Eguzkia izanen da

Gure lagun bakarra

Haren fereka eztia

Egun osoz larruan.

Gure egunik ederrenak...

Zabaldu leiho guztiak

Egurastu etxea.

Eguzkiak har dezala

Ilunaren tokia.

Gure egunik ederrenak...

MUNDUAREN EDERRA

Munduaren ederra kolokan beti

Zikina eta zatarra nonahi ageri.

Munduaren ederra tokitan beti

Gizonaren eskuak horri ezin eutsi.

Mendian ibili edo basoan zehar

Itsaso aldetik gertu edo erreka ondoan

Noranahi joaten naizela, horra edertasuna

Horren orpotik, ordea, azaldu itsuskeria.

Munduaren ederra kolokan beti...

Gizonaren hatsak zikindu egiten du

Giroa pozoindu eta erabat kutsatu

Lorategi eta baratza erro-errotik usteldu

Fruitu eta lore ederrak hondatu eta zimeldu.

Munduaren ederra kolokan beti...

Ahul eta hauskorra

Edertasuna

Ukituz gero

Desagertzen da.

Ahul eta hauskorra

Apurtu erraza

Hamaika zatitan

Hautsi egiten da.

Munduaren ederra kolokan beti.

ALFERRIKAKO AHALEGINA

Ezinbestekorik ez omen dago

la orok badu bere ordezeko

Maitaleak ere, nola ez, bada

Ordezka daitezke aise aski.

Zu ezagutu arte horretan nengoen

Zu ezagututa ez, ordea.

Behar zaitut orain, orain eta gertu

Suak oxigenoa bezainbat.

Ahalegindu izan naiz zu ez maitatzen.

Ahalegindu izan naiz zutaz ahazten.

Ahalegindu izan naiz, baina alferrik

Egotzi ezin baitzaitut nigandik.

Berezia zara eta aparta

Harribitxietan harribitxi

Horietako edozein bezain edertzat

Jo izan zaitut betidanik.

Zu ikusi ahala galduta nintzen

Eta harez gero preso nauzu.

Zure kateetatik askatze aldera

Borrokatu izan naiz jo eta su.

Ahalegindu izan naiz zu ez maitatzen...

GEZURREN BAT

Konta egidazu gezurren bat.

Maitasun eternala

Agindu berehala

Maitasun oso osoa

Gaur egun eta geroan.

Konta egidazu gezurren bat.

Gosearen asetzea

Diruaren akabera

Gorpuen berpiztea

Munduaren zoriona.

Konta egidazu gezurren bat.

BETI HOR, BETI ZOR

Deus ez da betiko munduan

Oro aldatzen baita ziztuan.

Atzo ernegai zena non da orain?

Deus ez da gelditzen gure zain.

Zu, ordea, beti zaude hor

Isil eta herabe baina hor.

Argia niretzat gauetan

Aldi guztietan emankor.

Inperioak erori egin dira

Urreak arin galdu dirdira

Mendeetan irauteko sortua

Aspalditik daukagu ahaztua.

Zu, ordea, beti zaude hor...

Beti zaude hor

Nire alde gogor.

Beti zaude hor

Asko dizut zor.

Zu, ordea, beti zaude hor...

ILARGIPEAN

Munduan barna zakur deslai

Noraezean baina alai.

Bakarrik ibilita ez naiz ikaratzen

Zure laguntzak, berriz, nau asebetetzen.

Ilargipean dantza egin dezagun

Ilargipean gozo eta trinko

Ilargipean jira eta bira

Munduaz ahaztu arte.

Laino ilunak agertzean

Itzultzen naiz zuregana

Ilunpea orduan urratu egiten da

Dena argitzen baitu zure irribarreak.

Ilargipean dantza egin dezagun...

Bide ertzean atezuan

Hamaika munstro esperoan

Baina ez naute izutzen, ez diet ihes egiten

Zure ondoan salbu bainaiz ni egoten.

Ilargipean dantza egin dezagun.

EDENGO BARATZA

Zure mundu ederra

Zinez mundu bikaina

Tamala ez izatea

Benetakoa.

Baina hala balitz

Han nahiko nuke bizi

Zure aldamenean

Betiko.

Paradisua lekutan da.

Kito Edengo baratza.

Joria zena agorra orain

Guztia usteltzera utzita.

Horrela ikusteko

Zer begi mota behar?

Nora zatarra bihurtu

Edertasun?

Ahalegindu izan naiz

Baina debalde izan da

Zaborra baino ezin nik ikusi.

Paradisua lekutan da...

BOTILARENA

Botila guztiak aski ez izan nonbait

Gure egarria asetzeko.

Ardoa ona da, hoberik ote da?

Jainkoen opari guretzat.

Bizitzak gogor jotzen gaitu sarritan

Behin eta berri jotzen gaitu ezustean.

Maite izan gintuztenak non dira?

Ezkutatu al dira lainotan?

Kristoren odola, txit sagaratua

Mirariak egiteko gauza.

Edan dezagun ba, ahal den bitartean

Agortu baino lehen guztia.

Bizitzak gogor jotzen gaitu...